



Ciorclán Uimh. 0037/2011

Ciorclán chuig Údaráis Bhainistíochta i mBunscoileanna, i Meánscoileanna, i bPobalscoileanna agus i Scoileanna Cuimsitheacha agus chuig Príomh-Oifigigh Feidhmiúcháin na gCoistí Gairmoideachais maidir le Socruithe Athbhreithnithe i ndáil le Soláthar Tacaíochtaí Teagaisc Acmhainne don scoilbhliain 2011/12.

1. Tacaíocht Teagaisc Acmhainne

Méadaíodh an leithdháileadh foriomlán de Thacaíocht Teagaisc Acmhainne do 2011/2012 ón leithdháileadh do 2010/2011. Mar sin féin, comhaontaíodh Creat Rialaithe Fostaíochta (ECF) don Roinn Oideachais agus Scileanna don tréimhse 2011 go dtí 2014 mar chuid de smacht a choimeád ar an líon foirne san earnáil phoiblí agus ar bhille pá na hearnála poiblí. Tá baint amach rathúil na rialuithe sin ar an líon foirne mar chuid ríthábhachtach de Comhaontú an AE/IMF ar Thacaíocht Airgeadais d'Éirinn a chomhlíonadh. Má theipeann orainn an comhaontú sin a chomhlíonadh, cuirfear an pacáiste tacaíochta airgeadais idirnáisiúnta atá á chur ar fáil i mbaoil.

Dá bharr sin, tá socruithe nua curtha ar bun ag an Roinn Oideachais agus Scileanna anois chun na hacmhainní a leithdháileadh ar shlí níos céimnithe, le haird a thabhairt ar éileamh agus lena chinntiú nach sárófar téarmaí an Chreata Rialaithe Fostaíochta.

Is é cuspóir an Chiorcláin seo ná na socruithe atá á gcur ar bun don scoilbhliain 2011/12 maidir le leithdháileadh uaireanta Teagaisc Acmhainne do leanaí a bhfuil riachtanais speisialta oideachais measúnaithe acu a chur in iúl do scoileanna.

Seo a leanas príomhghnéithe na socruithe atá á leagan amach sa Chiorclán seo:

(i) Maidir leis an scoilbhliain 2011/12 atá le teacht, déanfar leithdháileadh de 90% de leithdháiltí teagaisc acmhainne aitheanta bailí ar scoileanna, ar dtús, le formhór a gcuid leithdháiltí a chur ar fáil do scoileanna, fad a gcoimeádfar a dhóthain acmhainneachta le déileáil le hiarratais dheireanacha agus lena chinntiú go bhféadfaidh an Roinn Oideachais agus Scileanna cloí le hoibleagáidí an Chreata Rialaithe Fostaíochta.

(ii) Iarrtar ar scoileanna aon iarratas amuigh, nó aon ábhair bhreise amuigh a thacaíonn le hiarratais neamhiomlána, a chur ar aghaidh chuig an NCSE lena mbreithniú, chomh luath agus is féidir agus tráth nach déanaí ná 16 Meán Fómhair 2011.

(iii) Tar éis na hiarratais go léir a gheofar a bhreithniú, d'fhéadfaí an príomh-leithdháileadh de 90% a athbhreithniú agus a mhéadú, má thugann an leibhéal éilimh deis é sin a dhéanamh.

2. Ciorclán Tacaíochta

Ba chóir an ciorclán seo a léamh i gcomhar le Ciorclán 30/2011: *Socruithe don Scoilbhliain 2011/12 maidir le Poist mar Mhúinteoirí Tacaíochta Foghlama/Acmhainne (MTF/A) – Poist Lánaimseartha agus Páirt-Aimseartha*. Thug an Ciorclán sin mionsonraí do scoileanna faoi na socruithe eatramhacha a bhí le cur i bhfeidhm maidir le poist Teagaisc Acmhainne a leithdháileadh don scoilbhliain 2011/12, ar feitheamh tuilleadh breithnithe ar an líon iarratas ar thacaíocht Teagaisc Acmhainne a bhí á fháil agus a thug mionsonraí faoi na socruithe a bhí le cur i bhfeidhm maidir le poist agus folúntais a líonadh.

Ba chóir do bhunscoileanna an acmhainneacht bhreise i bpoist lánaimseartha a chinneadh bunaithe ar na leithdháiltí arna gceadú ag an NCSE atá á gcur in iúl do scoileanna anois. Beidh an leithdháileadh arna cheadú ag an NCSE in uaireanta an chloig agus d'fhéadfadh cuid d'uair an chloig a bheith ann. Ba chóir na socruithe roinnte áitiúla idir bunscoileanna a leagan amach ar shlí a chinnteoidh go mbainfear an leas is mó is féidir as acmhainneacht bhreise i bpoist lánaimseartha.

Déanann an Ciorclán seo leasú ar Chiorclán 08/02 freisin: *Iarratais ar oidethacaíocht i mbun acmhainní ar bhonn lánaimseartha nó páirt-aimseartha chun déileáil le riachtanais speisialta oideachais leanaí faoi mhíchumais* agus an Ciorclán SP ED 02/05: *Acmhainní Teagaisc a Eagrú do Dhaltaí i mBunscoileanna Príomhshrutha a mbeidh Tacaíocht sa Bhreis uathu.*

3. Cúlra

Déanann an NCSE uaireanta Teagaisc Acmhainne a leithdháileadh ar scoileanna de réir chritéir na Roinne Oideachais agus Scileanna, ar mhaithe le mic léinn a dteastaíonn tacaíocht oideachais bhreise uathu, bunaithe ar leibhéil riachtanais speisialta oideachais mheasúnaithe agus bunaithe ar an gcatagóir míchumais. Leanann poist lánaimseartha nó páirt-aimseartha as na huaireanta breise a cheadaítear do theagasc acmhainne.

Cuireadh stad sealadach leis an bpróiseas leithdháilte ó dheireadh mhí Márta i mbliana, mar gheall go bhféadfadh sárú ar líon na múinteoirí faoin gCreat Rialaithe Fostaíochta (ECF) tarlú de bharr an ráta iarratais ar uaireanta/ar phoist Teagaisc Acmhainne a fuarthas go dtí sin i mbliana.

Tugadh an stad sealadach isteach le deis a thabhairt don Roinn Oideachais agus Scileanna agus don NCSE an leibhéal éilimh a chainníochtú, agus le próiseas leithdháilte leasaithe a cheapadh, lena chinntiú nach sárófaí an ECF.

Chuir Ciorclán 04/11 an NCSE in iúl do scoileanna go raibh an stad sealadach sin curtha ar bun agus d'iarr sé ar scoileanna gach iarratas ar mhúinteoirí acmhainne a chur isteach faoin 13 Bealtaine 2011.

4. Leithdháileadh do 2011/12

Bunaithe ar an líon iarratas a fuarthas roimh an spriocdháta agus mar aitheantas go mb'fhéidir nach raibh cuid de na scoileanna in ann a gcuid iarratas a chur i gcrích faoin

dáta sin, is féidir leithdháileadh de 90% de na leithdháiltí teagaisc acmhainne aitheanta bunaidh a dhéanamh ar scoileanna anois, ar dtús, le formhór a leithdháiltí a chur ar fáil do scoileanna. Tabharfaidh sin deis don NCSE iarratais eile a bhreithniú agus aird a thabhairt ar aon neamhéifeachtachtaí a d'fhéadfadh teacht chun cinn, fad a choinnítear a dhóthain acmhainneachta lena chinntiú go bhféadfaidh leithdháiltí cloí le hoibleagáidí an Chreata Rialaithe Fostaíochta. **Beidh feidhm ag an ráta leithdháilte sin le gach leithdháileadh múinteora acmhainne arna chinneadh ag an NCSE agus ní le leithdháiltí nua agus iad sin amháin.**

Cinntoidh an beart leithdháilte sin go gcaithfear le gach scoil a mbeidh tacaíocht Teagaisc Acmhainne á fáil aici ar an tslí chéanna.

Déanann Ciorclán SP.ED 08/02 soláthar go mbeidh post an Mhúinteora Acmhainne ina phost breise a leithdháiltear chun cabhrú le scoil nó le cnuasach scoileanna oideachas a chur ar fáil a fhreastalóidh ar riachtanais leanaí a ndéantar measúnú orthu ar bhonn riachtanais aonair mar leanaí a bhfuil riachtanais speisialta oideachais acu de bharr míchumais. Is iarracht uile-scoile é freastal ar riachtanais leanaí den sórt sin, agus ní freagracht na múinteoirí acmhainne amháin, de bharr go mbíonn na leanaí sin lánpháirtithe go hiomlán i scoil phríomhshrutha agus go gcaitheann siad formhór a gcuid ama le múinteoir príomhshrutha.

Déanann Ciorclán 34/03 soláthar, cé go gceadaítear leithdháiltí teagaisc acmhainne ar bhonn iarratas aonair, gurb é an bunphrionsabal leis ná go ndéanfaí na hacmhainní a scaipeadh ar an tslí is fearr a bhfreastalóidh ar riachtanais dhaltaí a bhfuil riachtanais speisialta acu sa scoil. Is féidir sin a bhaint amach trí thacú le daltaí sa seomra ranga príomhshrutha nó trí theagasc i ngrúpaí beaga. Ní gá gur tacaíocht teagaisc indibhidiúil 1:1 a chur ar fáil is cuspóir don leithdháileadh.

Bhuail an Roinn Oideachais agus Scileanna le comhlachtaí Bainistíochta i mBunscoileanna agus i Meánscoileanna chun cúrsaí a chur in iúl dóibh.

Tá údarú á thabhairt don NCSE tacaíocht Teagaisc Acmhainne a leithdháileadh ar scoileanna ar an mbonn a leagtar amach sa Chiorclán seo.

5.Iarratais Amuigh

Ba é 13 Bealtaine, 2011 an dáta deiridh d'iarratais ar thacaíocht Teagaisc Acmhainne don scoilbhliain amach romhainn a bheith faighte.

D'ainneoin sin, agus mar aitheantas go mb'fhéidir go bhfuil roinnt scoileanna ag fanacht ar iarratais nó ag fanacht ar thuairiscí liachta, iarrtar ar scoileanna anois aon iarratais amuigh, nó aon ábhair bhreise amuigh a thacaíonn le hiarratais neamhiomlána, a chur ar aghaidh chuig an NCSE le go ndéanfar an breithniú deiridh orthu maidir le tacaíocht Teagaisc Acmhainne don scoilbhliain amach romhainn, chomh luath agus is féidir agus tráth nach déanaí ná 16 Meán Fómhair 2011.

Tar éis na leithdháiltí amuigh a fháil, sa chás go mbeidh an t-éileamh níos lú ná mar a bhíothas ag súil leis, d'fhéadfaí an príomh-leithdháileadh de 90% a athbhreithniú agus a mhéadú.

Má tá aon cheist agat faoin gclár seo, téigh i dteagmháil, le do thoil, leis an Aonad Speisialta oideachais ar 090-648 4166 / 4187.

Is féidir teacht ar an gclár seo ar láithreán gréasáin na Roinne ag www.education.ie.

Jim Mulkerrins
Príomhoifigeach
An tAonad Uilechuimsitheachta Sóisialta

31 Bealtaine 2011